



Ayat Suci Minggu ini

Kisah Para Rasul 2:1-11
Mazmur 103:1, 24, 29-31, 34
1 Korintus 12:3-7, 12-13
Yohanes 20:19-23



DOA

Datanglah, ya Roh Kudus, penuhilah hati umat-Mu, dan nyalakanlah di dalamnya api cinta-Mu. Utuslah Roh-Mu, maka segala sesuatu akan diciptakan kembali, dan Engkau akan memperbaharui muka bumi.

EDARAN DALAMAN SAHAJA
BUL 21/2026

Sebagaimana para murid diperkasa pada hari Pentekosta, demikian juga kita dipanggil untuk membuka hati kepada kehadiran Roh Kudus yang mengubah hidup. Untuk menerima karunia Roh Kudus, kita terlebih dahulu perlu memupuk kehidupan doa yang lebih mendalam. Apabila kita berdoa, kita membiarkan Roh membimbing dan membentuk kita, menolong kita mengenali bakat-bakat istimewa yang telah dianugerahkan Allah kepada kita, serta menuntun kita kepada tujuan yang telah disediakan Allah bagi kita.

Perjalanan untuk menemukan karunia Allah ini amat penting terutamanya bagi kaum muda. Keluarga memainkan peranan yang sangat penting dalam menemani mereka agar bertumbuh dalam iman dan belajar mengenali bakat yang mereka miliki. Sama ada karunia itu terserlah dalam pelayanan, kreativiti, kepimpinan, atau belas kasih, keluarga dapat membimbing kaum muda untuk melihat kebolehan ini bukan semata-mata sebagai pencapaian peribadi, tetapi sebagai anugerah daripada Allah yang harus digunakan untuk melayani sesama dan memuliakan-Nya.

Pada masa yang sama, komuniti paroki juga mempunyai perutusan penting untuk menemani para calon Krisma yang sedang bersiap sedia menerima karunia Roh Kudus. Melalui bimbingan para katekis, imam, penaja, dan seluruh komuniti umat beriman, kaum muda didorong untuk memahami makna yang lebih mendalam tentang sakramen yang akan mereka terima. Paroki menjadi tempat di mana mereka disokong, didengarkan, dan diinspirasikan untuk hidup sebagai anggota Gereja yang aktif.

Oleh itu, kisah Pentekosta mengajak setiap seorang daripada kita untuk merenungkan sejauh mana keterbukaan kita kepada Roh Kudus dan bagaimana kita menyahut kehadiran-Nya dalam hidup kita. Apabila keluarga dan komuniti paroki berjalan bersama kaum muda, kita menolong mereka menyedari bahawa karunia yang mereka terima bukan untuk disembunyikan, tetapi untuk dikongsikan demi membangun Kerajaan Allah. Dengan menemani, Roh Kudus terus berkarya, membaharui Gereja dalam setiap generasi. ✠

Diterbitkan oleh: Archdiocesan Pastoral Institute (API) | Emel: api@archkl.org

NEWBEC

NEW WAY OF BEING CHURCH | Pentakosta | 24 Mei 2026

BERJALAN BERSAMA KE ARAH SEBUAH GEREJA SINODAL DAN PROFETIK

Umat Untuk Pemuridan Misionari



Pentekosta ialah saat apabila janji Yesus digenapi. Para murid yang ketakutan dan pernah bersembunyi di sebalik pintu yang tertutup telah diubah menjadi saksi Injil yang berani. Saat yang penuh kuasa ini mengingatkan kita bahawa Roh Allah terus menghembuskan kehidupan baharu ke dalam Gereja dan ke dalam diri setiap orang beriman pada hari ini.